



Gemeinsam Äntwert vun der Justizministesch Elisabeth MARGUE, dem Inneminister Léon Gloden an dem Minister fir Wirtschaft, PME, Energie an Tourismus Lex DELLES op d'parlamentaresch Fro N° 3953 vum 21. Abrëll 2026 vum honorabelen Deputéierten Sven Clement zum Sujet « Lien entre le Luxembourg et l'Online Rape Academy »

1. Ass d'Existenz vun der Firma „Kick Online Entertainment S.A.“ am Lëtzebuenger Handelsregëster bekannt, a wa jo, ënnert wéi engem Status ass dës Firma zu Lëtzebuerg enregistréiert?

Eng Recherche am Lëtzebuenger Handels- a Gesellschaftsregëster (RCS), deem déi offiziell Plattform fir esou Donnéeën ass an och ëffentlech zougänglech ass, ergëtt, datt aktuell keng Gesellschaft mam Numm „Kick Online Entertainment S.A.“ registréiert ass. Ausserdeem konnt och keng änlech oder vergläichbar Gesellschaft am Regëster identifizéiert ginn. Och an den eeleren Donnéeën, déi zënter der Informatiséierung vum Luxembourg Business Registers (LBR) disponibel sinn, gëtt et keng Informatioun vun enger Gesellschaft mat dësem oder engem änleche Numm.

D'Etüd, déi vum Informatiounskanal CNN publizéiert gouf, bezitt sech op eng Decisioun vum britteschen Ofcom. Dës Decisioun, déi um Internetsite vun der Institutioun consultéiert ka ginn, mécht awer Referenz op eng Gesellschaft, déi a Costa Rica etabléiert ass, an net zu Lëtzebuerg. Et schéngt also éischer, datt et e Feeler ass, wann an der Press ugi gëtt, datt déi an der Ofcom-Decisioun ernimmte Gesellschaft hire Sëtz zu Lëtzebuerg hätt.

2. Huet d'Regierung oder eng lëtzebuergesch Opsichtsbehörde (Police Parquet, ILR, CNPD oder aner) Kontakt mat dem brittesche Reguléierungsdéngscht Ofcom am Zesammenhang mat dëser Firma oder dëse Plattformen gehat?

Vu dass et keng lëtzebuergesch Firma ass, ass d' Äntwert Nee.

3. Wéi eng Kompetenzen hu lëtzebuergesch Autoritéiten, fir géint Firmen, déi hire Sëtz zu Lëtzebuerg hunn an awer am Ausland reguléiert ginn, am Beräich vum illegalen Online-Contentu virzegoen?

D'Iwwerwaachung vu Plattformen gëtt an der Europäescher Unioun vum „Digital Services Act“ („DSA“) gereegelt. De generelle Prinzip gesäit vir, datt de Memberstaat, an deem déi respektiv Plattform etabléiert ass, fir d'Iwwerwaachung vun dëser Plattform zoustänneg ass. De Memberstaat, an deem d'Plattform etabléiert ass, huet deemno och den exklusive Pouvoir, fir am Fall vun Infraktiounen, déi néideg Measure géint eng Plattform ze huelen.

Den DSA gesäit allerdéngs eng Ausnam vir, fir déi ganz grouss Plattformen, déi méi wéi 45 Milliounen Notzer pro Mount opweisen. Wëll dës Plattformen en Aktivitéitsberäich hunn, deem sech iwwert déi ganz EU erstreckt, ass d'EU-Kommissioun fir d'Iwwerwaachung vun dëse Plattformen zoustänneg. Bis elo huet d'EU-Kommissioun Ronn 25 Plattformen als sougenannt „Very Large Online Platforms“



(“VLOP”) op EU-Niveau identifizéiert an designéiert. D’Entreprise “Kick Online Entertainment S.A.” gehéiert momentan net dozou.

Fir déi praktesch Ëmsetzung vum DSA muss all EU-Memberstaat op nationalem Niveau eng onofhängeg Autoritéit designéieren, déi de Rôle vum “Digital Services Coordinator” (“DSC”) iwwerhëlt. Dësen DSC assuréiert d’Koordinatioun um EU-Niveau an tëscht de verschiddenen nationalen Autoritéiten a schafft, op Basis vum DSA, enk mat der EU-Kommissioun a mat den Autoritéite vun de 26 anere Memberstaaten zesummen. Zu Lëtzebuerg gouf d’Autorité de la Concurrence per Gesetz als DSC designéiert .

A Saachen Zesummenaarbecht gesäit den DSA Follgendes vir: wann en nationalen DSC – am Fall vu Lëtzebuerg, d’Autorité de la Concurrence – de Verdacht huet, datt eng Plattform, déi an engem aneren EU-Land etabléiert ass, géint d’Bestëmmunge vum DSA verstéisst, da kann si den DSC vum Memberstaat, an dem d’Plattform hire Sëtz an der EU huet, dozou opfuerderen, sech dem Fall unzehuelen an déi néideg Investigatiounen duerchzeféieren a Mesuren ze huelen.

4. Wëllt d'Regierung am Kader vum Digital Services Act (DSA) proaktiv handeln, fir ze préiwen, ob Plattformen mat Verbindung zu Lëtzebuerg hiren Obligatiounen betreffend d'Bekämpfung vun illegalem Inhalt nokommen, a wa jo, wéi?

D’Autorité de la concurrence ass als “Digital Services Coordinator” an als zoustänneg Autoritéit am Sënn vum Artikel 49 vum DSA fir d’Iwwerwaachung vun Ubidder vu Vermëttlungsdéngschter (Netzwerk- an Hostingubidder souwéi Online-Plattformen, wéi sozial Medien, Verkafs- a Videoplattformen) a fir d’Ëmsetzung vum DSA zoustänneg. Am Aklang mam DSA traitéiert d’Autorité de la concurrence d’Plainte vun Utilisateuren vu Plattformen a kann sech zousätzlech och auto-saiséieren, wann si Kenntnis vun Indizien iwwert e méigleche Verstouss huet.

5. Gesäit d'Regierung en Handlungsbedarf fir d’Koordinatioun tëscht lëtzebuergesche Justiz-, Police an Opsiichtsbehörden am Beräich vun online-baséierter sexueller Gewalt ze verstärken?

D’Police an d’Justiz koordinéieren sech aktuell schon am Beräich vun online-baséierter sexueller Gewalt a schaffen enk an effikass zesummen.

Zousätzlech ass d’Unitéit am Service de Police Judiciaire, déi fir dëse Beräich zoustänneg ass, rezent geziilt verstärkt ginn. Dës Efforte sollen och an Zukunft konsequent weidergefouert gi fir den ëmmer mei komplexen Erausforderungen adequat Rechnung ze droen an eng effizient Bekämpfung vun dëse Phenomener sécherzestellen.

Lëtzebuerg, den 20. Mai 2026

D' Justizministesch

(s.) Elisabeth Margue